

Fasnachts-Dangg 2025

Kai Doon heersch me, s duet langsam daage
S isch heggschti Zyt zem Dangge saage
Dangge fir all die vvyyle Händ
Wo vvyyl gschafft hänn bis zem Änd
Dr Bolizey, dr Sanität, dr BVB,
De Stroossewischer und vvyylne me
Wo grampft hänn drei Daag uff dr Gass
Jä mängmool drogge, mängmool nass
Dr Petrus het dängg – dasch verruggd
Halt denn e Dräänli als verdruggd
Und zwor voll Haiterkait und Fraid
Ab däre herrlig Augewaid
Wo drei Daag lang hesch könne gseh
Vvyyl Nemos und vvyyl ESC
Doch sicher au die dunggle Syte
Wo d Ladäärne, d Requisyte
Zaigt hänn, dass uff däre Wält
Au drieb isch als am Himmelszält
Dass s Arge zaigt wird, das isch richtig
Grad an dr Fasnacht au seer wichtig
Trotz däre dailwyys schwierig Laag
Luege mir zrugg uff die drei Daag
Mit Danggbarkait und Zfriedehait
Scheen isch es gsi – mir hänn e Fraid
Jetzt kunnt dr Bummel, denn dr ESC
Mir fraien ys – maint s Comité